

কাব্যগ্রন্থ

# প্রভাতসংগীত

রবীন্দ্রনাথ ঠাকুর



## সূচিপত্র

• সূচনা.....	3
• আহ্বানসংগীত.....	5
• নির্ঝরের স্বপ্নভঙ্গ.....	11
• প্রভাত- উৎসব.....	18
• অনন্ত জীবন.....	22
• অনন্ত মরণ.....	26
• পুনর্মিলন.....	29
• প্রতিধ্বনি.....	35
• মহাস্বপ্ন.....	41
• সৃষ্টি স্থিতি প্রলয়.....	43
• স্রোত.....	45
• চেয়ে থাকা.....	47
• সাধ.....	51
• সমাপন.....	56
• সংযোজন.....	58
• শরতে প্রকৃতি.....	60

প্রভাতসংগীত

শ্রীমতী ইন্দিরাদেবী  
প্রাণাধিকাসু  
রবিকাকা

# সূচনা

‘কড়ি ও কোমল’ রচনার পূর্বে কাব্যের ভাষা আমার কাছে ধরা দেয়নি। কাঁচা বয়সে মনের ভাবগুলো নূতনত্বের আবেগ নিয়ে রূপ ধরতে চাচ্ছে, কিন্তু যে উপাদানে তাদেরকে শরীরের বাঁধন দিতে পারত তারই অবস্থা তখন তরল; এইজন্যে ওগুলো হয়েছে ঢেউওয়ালা জলের উপরকার প্রতিবিম্বের মতো আঁকাবাঁকা, ওরা মূর্ত হয়ে ওঠে নি, সুতরাং কাব্যের পদবীতে পৌঁছতে পারে নি। সেইজন্য আমার মত এই যে, কড়ি ও কোমলের পর থেকেই আমার কাব্যরচনা ভালো মন্দ সব-কিছু নিয়ে একটা স্পষ্ট সৃষ্টির ধারা অবলম্বন করেছে।

প্রভাতসংগীতে যে অবস্থায় আমার প্রথম বিকাশোন্মুখ মন অপরিণত ভাবনা নিয়ে অপরিষ্কৃত রচনায় প্রবৃত্ত হয়েছিল, তার কথা আজও আমার মনে আছে। তার পূর্বে সঙ্ক্যাসংগীতের পর্বে আমার মনে কেবলমাত্র হৃদয়বেগের গদগদভাষী আন্দোলন চলছিল। প্রভাতসংগীতের ঋতুতে আপনা-আপনি দেখা দিতে আরম্ভ করেছে একটা-আধটা মননের রূপ, অর্থাৎ ফুল নয় সে, ফসলের পালা, সেও অশিক্ষিত বিনা চাষের জমিতে।

সেই সময়কার কথা মনে পড়ছে যখন কোথা থেকে কতকগুলো মত মনের অন্দর-মহলে জেগে উঠে সদরের দরজায় ধাক্কা দিচ্ছিল। ঐগুলোর নাম--অনন্ত জীবন, অনন্ত মরণ, প্রতিধ্বনি। ‘অনন্ত জীবন’ বলতে আমার মনে এই একটা ভাব এসেছিল--বিশ্বজগতে আসা এবং যাওয়া দুটোই থাকারই অন্তর্গত, ঢেউয়ের মতো আলোতে ওঠা এবং অন্ধকারে নামা। ক্ষণে ক্ষণে হাঁ এবং ক্ষণে ক্ষণে না নিয়ে এই জগৎ নয়, বিশ্বচরাচর গোচর-অগোচরের নিরবচ্ছিন্ন মালা গাঁথা। এই ভাবনাটা ভিতরে ভিতরে মনকে খুব দোলা দিয়েছিল। নিজের অন্তরের দিকে চেয়ে একটা ধারণা আমার মধ্যে জেগে উঠেছিল যে, আমার প্রতি মুহূর্তের সমস্ত ভালোমন্দ, আমার প্রতি দিনের সুখদুঃখের সমস্ত অভিজ্ঞতা চিরকালের মতো অনবরত একটা সৃষ্টিরূপ ধরছে, প্রকাশ-অপ্রকাশের নিত্য ওঠাপড়া নিয়ে যে সৃষ্টির স্বরূপ। এই কথাটা ভাবতে ভাবতেই মনে হল, মৃত্যু তা হলে কী॥ একরকম করে তার উত্তর এসেছিল এই যে, জীবন সব-কিছুকে রাখে আর মৃত্যু সব-কিছুকে চালায়। প্রতি

মুহূর্তেই মরছি আমি, আর সেই মরার ভিতর দিয়েই আমি বাঁচার রাস্তায় এগোচ্ছি, যেন আমার মধ্যে সেলাইয়ের কাজ চলছে-- গাঁথা পড়ছে অতীত, ভবিষ্যৎ, বর্তমান। মুহূর্তকালীন মৃত্যুপরম্পরা দিয়ে মর্তজীবন এই যেমন বেড়ে চলেছে প্রবালদ্বীপের মতো, তেমনি মৃত্যুর পর মৃত্যু আমাকে দিয়ে লোক-লোকান্তরের অভিজ্ঞতার জাল বিস্তার করে চলবে-- আমার চেতনার সূত্রটিকে নিয়ে মৃত্যু এক-এক ফোঁড়ে এক-এক লোককে সম্বন্ধসূত্রে গাঁথবে। মনে আছে, এই চিন্তায় আমার মনকে খুব আনন্দ দিয়েছিল। ‘প্রতিধ্বনি’ কবিতা লিখেছিলুম যখন প্রথম গিয়েছিলুম দার্জিলিঙে। যে ভাবে তখন আমাকে আবিষ্ট করেছিল সেটা এই যে-- বিশ্বসৃষ্টি হচ্ছে একটা ধ্বনি, আর সে প্রতিধ্বনিরূপে আমাকে মুগ্ধ করছে, ক্ষুব্ধ করছে, আমাকে জাগিয়ে রাখছে, সেই সুন্দর, সেই ভীষণ। সৃষ্টির সমস্ত গতিপ্রবাহ নিত্যই একটা কোন্ কেন্দ্রস্থলে গিয়ে পড়ছে আর সেখান থেকে প্রতিধ্বনিরূপে নির্ঝরিত হচ্ছে আলো হয়ে, রূপ হয়ে, ধ্বনি হয়ে। এই ভাবগুলো যদিও অস্পষ্ট, তবু আমার মনের মধ্যে খুব প্রবল হয়ে আন্দোলিত হচ্ছিল, মুখে মুখে কোনো কোনো বন্ধুর সঙ্গে আলোচনাও করেছি। কিন্তু এ-সকল ভাবনা তখন কী গদ্যে কী পদ্যে আলোচনা করবার সময় হয় নি, তখনো পাই নি ভাষাভারতীর প্রসাদ। তাই বলে রাখছি, প্রভাতসংগীতে এ-সমস্ত লেখার আর-কোনো মূল্য যদি থাকে, সে যোলো- আনা সাহিত্যিক মূল্য নয়।

# আহ্বানসংগীত

ওরে তুই জগৎ-ফুলের কীট,  
জগৎ যে তোর শুকায়ে আসিল,  
মাটিতে পড়িল খসে- -  
সারা দিন রাত গুমরি গুমরি  
কেবলি আছিস বসে।  
মড়কের কণা, নিজ হাতে তুই  
রচিলি নিজের কারা,  
আপনার জালে জড়িয়ে পড়িয়া  
আপনি হইলি হারা।  
অবশেষে কারে অভিশাপ দিস  
হাহুতাশ করে সারা,  
কোণে বসে শুধু ফেলিস নিশাস,  
ঢালিস বিষের ধারা।

জগৎ যে তোর মুদিয়া আসিল,  
ফুটিতে নারিল আর,  
প্রভাত হইলে প্রাণের মাঝারে  
ঝরে না শিশিরধার।  
ফেলিস নিশাস, মরুর বাতাস  
জ্বলিস জ্বালাস কত,  
আপন জগতে আপনি আছিস  
একটি রোগের মতো।  
হৃদয়ের ভার বহিতে পার না,  
আছ মাথা নত করে- -

ফুটিবে না ফুল, ফলিবে না ফল,  
শুকায়ে পড়িবে মরে।

রোদন,রোদন, কেবলি রোদন,  
কেবলি বিষাদশ্বাস- -  
লুকায়ে, শুকায়ে, শরীর গুটায়  
কেবলি কোটরে বাস।  
নাই কোনো কাজ--মাঝে মাঝে চাস  
মলিন আপনা-পানে,  
আপ্পার স্নেহে কাতর বচন  
কহিস আপন কানে।  
দিবস রজনী মরীচিকাসুরা  
কেবলি করিস পান।  
বাড়িতেছে তৃষা, বিকারের তৃষা- -  
ছটফট করে প্রাণ।  
'দাও দাও' ব'লে সকলি যে চাস,  
জঠর জ্বলিছে ভুখে- -  
মুঠি মুঠি ধুলা তুলিয়া লইয়া  
কেবলি পুরিস মুখে।  
নিজের নিশাসে কুয়াশা ঘনায়  
ঢেকেছে নিজের কায়া,  
পথ আঁধারিয়া পড়েছে সমুখে  
নিজের দেহের ছায়া।  
ছায়ার মাঝারে দেখিতে না পাও,  
শব্দ শুনিলে ডর' - -  
বাহু প্রসারিয়া চলিতে চলিতে,  
নিজেরে আঁকড়ি ধর' ।  
চারি দিকে শুধু ক্ষুধা ছড়াইছে

যে দিকে পড়িছে দিঠ,  
বিষেতে ভরিলি জগৎ রে তুই  
কীটের অধম কীট।

আজিকে বারেক ভ্রমরের মতো  
বাহির হইয়া আয়,  
এমন প্রভাতে এমন কুসুম  
কেন রে শুকায়ে যায়।  
বাহিরে আসিয়া উপরে বসিয়া  
কেবলি গাহিবি গান,

তবে সে কুসুম কহিবে রে কথা,  
তবে সে খুলিবে প্রাণ।  
আকাশে হাসিবে তরণ তপন,  
কাননে ছুটিবে বায়,  
চারি দিকে তোর প্রাণের লহরী  
উথলি উথলি যায়।

বায়ুর হিল্লোলে ধরিবে পল্লব  
মরমর মৃদু তান,  
চারি দিক হতে কিসের উল্লাসে  
পাখিতে গাহিবে গান।  
নদীতে উঠিবে শত শত ঢেউ,  
গাবে তারা কল কল,  
আকাশে আকাশে উথলিবে শুধু  
হরষের কোলাহল।

কোথাও বা হাসি কোথাও বা খেলা  
কোথাও বা সুখগান--

মাঝে বসে তুই বিভোর হইয়া,  
আকুল পরানে নয়ান মুদিয়া  
অচেতন সুখে চেতনা হারায়ে  
করিবি রে মধুপান।  
ভুলে যাবি ওরে আপনারে তুই  
ভুলে যাবি তোর গান।  
মোহ ছুটিবে রে নয়নেতে তোর,  
যে দিকে চাহিবি হয়ে যাবে ভোর,  
যাহারে হেরিবি তাহারে হেরিয়া  
মজিয়া রহিবে প্রাণ।  
ঘুমের ঘোরেতে গাহিবে পাখি  
এখনো যে পাখি জাগে নি,  
ভোরের আকাশ ধ্বনিয়া ধ্বনিয়া  
উঠিবে বিভাসরাগিণী।  
জগৎ-অতীত আকাশ হইতে  
বাজিয়া উঠিবে বাঁশি,  
প্রাণের বাসনা আকুল হইয়া  
কোথায় যাইবে ভাসি।  
উদাসিনী আশা গৃহ তেয়াগিয়া  
অসীম পথের পথিক হইয়া  
সুদূর হইতে সুদূরে উঠিয়া  
আকুল হইয়া চায়,  
যেমন বিভোর চকোরের গান  
ভেদিয়া ভেদিয়া সুদূর বিমান  
চাঁদের মরণে মরিতে গিয়া  
মেঘেতে হারায়ে যায়।

মুদিত নয়ান, পরান বিভল,  
স্তব্ধ হইয়া শুনিবি কেবল,  
জগতেরে সদা ডুবায়ে দিতেছে  
জগৎ-অতীত গান- -  
তাই শুনি যেন জাগিতে চাহিছে  
ঘুমেতে-মগন প্রাণ।  
জগৎ বাহিরে যমুনাপুলিনে  
কে যেন বাজায় বাঁশি,  
স্বপন-সমান পশিতেছে কানে  
ভেদিয়া নিশীথরাশি- -

এ গান শুনি নি, এ আলো দেখি নি,  
এ মধু করিনি পান,  
এমন বাতাস পরান পুরিয়া  
করে নি রে সুধা দান,  
এমন প্রভাত-কিরণ মাঝার  
কখনো করি নি স্নান,  
বিফলে জগতে লভিনু জনম,  
বিফলে কাটিল প্রাণ।  
দেখ্ রে সবাই চলেছে বাহিরে  
সবাই চলিয়া যায়,  
পথিকেরা সবে হাতে হাতে ধরি  
শোন্ রে কী গান গায়।  
জগৎ ব্যাপিয়া শোন্ রে সবাই  
ডাকিতেছে, আয়, আয়- -  
কেহ বা আগেতে কেহ বা পিছায়,  
কেহ ডাক শুনে ধায়।

অসীম আকাশে স্বাধীন পরানে  
প্রাণের আবেগে ছোটে,  
এ শোভা দেখিলে জড়ের শরীরে  
পরান নাচিয়া ওঠে।  
তুই শুধু ওরে ভিতরে বসিয়া  
গুমরি মরিতে চাস!  
তুই শুধু ওরে করিস রোদন,  
ফেলিস দুখের শ্বাস!  
ভূমিতে পড়িয়া আঁধারে বসিয়া  
আপনা লইয়া রত  
আপনারে সদা কোলেতে তুলিয়া  
সোহাগ করিস কত!  
আরকতদিন কাটিবে এমন,  
সময় যে চলে যায়।  
ওই শোন্ ওই ডাকিছে সবাই,  
বাহির হইয়া আয়!

# নির্ঝরের স্বপ্নভঙ্গ

আজি এ প্রভাতে প্রভাতবিহগ  
কী গান গাইল রে!  
অতিদূর দূর আকাশ হইতে  
ভাসিয়া আইল রে!  
না জানি কেমনে পশিল হেথায়  
পথহারা তার একটি তান,  
আঁধার গুহায় ভ্রমিয়া ভ্রমিয়া  
গভীর গুহায় নামিয়া নামিয়া  
আকুল হইয়া কাঁদিয়া কাঁদিয়া  
ছুঁয়েছে আমার প্রাণ।  
আজি এ প্রভাতে সহসা কেন রে  
পথহারা রবিকর  
আলয় না পেয়ে পড়েছে আসিয়ে  
আমার প্রাণের ' পর!  
বহুদিন পরে একটি কিরণ  
গুহায় দিয়েছে দেখা,  
পড়েছে আমার আঁধার সলিলে  
একটি কনকরেখা।  
প্রাণের আবেগ রাখিতে নারি  
থর থর করি কাঁপিছে বারি,  
টলমল জল করে থল থল,  
কল কল করি ধরেছে তান।  
আজি এ প্রভাতে কী জানি কেন রে  
জাগিয়া উঠেছে প্রাণ।  
জাগিয়া দেখিনু, চারিদিকে মোর

পাষাণে রচিত কারাগার ঘোর,  
বুকের উপরে আঁধার বসিয়া  
করিছে নিজের ধ্যান।  
না জানি কেন রে এতদিন পরে  
জাগিয়া উঠেছে প্রাণ।

জাগিয়া দেখিনু আমি আঁধারে রয়েছি আঁধা,  
আপনারি মাঝে আমি আপনি রয়েছি বাঁধা।  
রয়েছি মগন হয়ে আপনারি কলস্বরে,  
ফিরে আসে প্রতিধ্বনি নিজেরি শ্রবণ-'পরে।  
দূর দূর দূর হতে ভেদিয়া আঁধার কারা  
মাঝে মাঝে দেখা দেয় একটি সন্ধ্যার তারা।  
তারি মুখ দেখে দেখে আঁধার হাসিতে শেখে,  
তারি মুখ চেয়ে চেয়ে করে নিশি অবসান।  
শিহরি উঠে রে বারি,দোলে রে দোলে রে প্রাণ,  
প্রাণের মাঝারে ভাসি দোলে রে দোলে রে হাসি,  
দোলে রে প্রাণের 'পরে আশার স্বপন মম,  
দোলে রে তারার ছায়া সুখের আভাস- সম।

মাঝে মাঝে একদিন আকাশেতে নাই আলো,  
পড়িয়া মেঘের ছায়া কালো জল হয় কালো।  
আঁধার সলিল- 'পরে ঝর ঝর বারি ঝরে  
ঝর ঝর ঝর ঝর,দিবানিশি অবিরল- -  
বরষার দুখ-কথা,বরষার আঁখিজল।  
শুয়ে শুয়ে আনমনে দিবানিশি তাই শুনি  
একটি একটি ক'রে দিবানিশি তাই গুনি,  
তারি সাথে মিলাইয়া কল কল গান গাই- -  
ঝর ঝর কল কল--দিন নাই, রাত নাই।

এমনি নিজেরে লয়ে রয়েছি নিজের কাছে,  
আঁধার সলিল -'পরে আঁধার জাগিয়া আছে।  
এমনি নিজের কাছে খুলেছি নিজের প্রাণ,  
এমনি পরের কাছে শুনেছি নিজের গান।

আজি এ প্রভাতে রবির কর  
কেমনে পশিল প্রাণের ' পর,  
কেমনে পশিল গুহার আঁধারে  
প্রভাত-পাখির গান।  
না জানি কেন রে এতদিন পরে

জাগিয়া উঠিল প্রাণ।

জাগিয়া উঠেছে প্রাণ,  
ওরে উথলি উঠেছে বারি,  
ওরে প্রাণের বাসনা প্রাণের আবেগ  
রুধিয়া রাখিতে নারি।

থর থর করি কাঁপিছে ভূধর,  
শিলা রাশি রাশি পড়িছে খসে,  
ফুলিয়া ফুলিয়া ফেনিল সলিল  
গরজি উঠিছে দারুণ রোষে।  
হেথায় হেথায় পাগলের প্রায়  
ঘুরিয়া ঘুরিয়া মাতিয়া বেড়ায়,  
বাহিরিতে চায়, দেখিতে না পায়

কোথায় কারার দ্বার।

প্রভাতেরে যেন লইতে কাড়িয়া  
আকাশেরে যেন ফেলিতে ছিঁড়িয়া  
উঠে শূন্যপানে---পড়ে আছাড়িয়া

করে শেষে হাহাকার।  
প্রাণের উল্লাসে ছুটিতে চায়  
ভূধরের হিয়া টুটিতে চায়,  
আলিঙ্গন তরে উর্ধ্ব বাহু তুলি  
আকাশের পানে উঠিতে চায়।

প্রভাতকিরণে পাগল হইয়া  
জগৎ-মাঝারে লুটিতে চায়।  
কেন রে বিধাতা পাষণ হেন,  
চারি দিকে তার বাঁধন কেন?  
ভাঙ রে হৃদয় ভাঙ রে বাঁধন,  
সাধ রে আজিকে প্রাণের সাধন,  
লহরীর পরে লহরী তুলিয়া  
আঘাতের পর আঘাত কর।  
মাতিয়া যখন উঠিছে পরান  
কিসের আঁধার, কিসের পাষণ!  
উথলি যখন উঠিছে বাসনা,  
জগতে তখন কিসের ডর!

সহসা আজি এ জগতের মুখ  
নূতন করিয়া দেখিনু কেন?  
একটি পাখির আধখানি তান  
জগতের গান গাহিল যেন!  
জগৎ দেখিতে হইব বাহির  
আজিকে করেছি মনে,  
দেখিব না আর নিজেরি স্বপন

বসিয়া গুহার কোণে।  
আমি ঢালিব করুণাধারা,  
আমি ভাঙিব পাষণকারা,  
আমি জগৎ প্লাবিয়া বেড়াব গাহিয়া  
আকুল পাগল-পারা;  
কেশ এলাইয়া, ফুল কুড়াইয়া,  
রামধনু-আঁকা পাখা উড়াইয়া,  
রবির কিরণে হাসি ছড়াইয়া,  
দিব রে পরান ঢালি।  
শিখর হইতে শিখরে ছুটিব,  
ভূধর হইতে ভূধরে লুটিব  
হেসে খলখল গৈয়ে কলকল  
তালে তালে দিব তালি।  
তটিনী হইয়া যাইব বহিয়া- -  
যাইব বহিয়া--যাইব বহিয়া- -  
হৃদয়ের কথা কহিয়া কহিয়া  
গাহিয়া গাহিয়া গান,  
যত দেব প্রাণ বহে যাবে প্রাণ  
ফুরাবে না আর প্রাণ।  
এত কথা আছে এত গান আছে  
এত প্রাণ আছে মোর,  
এত সুখ আছে এত সাধ আছে  
প্রাণ হয়ে আছে ভোর।

এত সুখ কোথা    এত রূপ কোথা  
এত খেলা কোথা আছে!  
যৌবনের বেগে    বহিয়া যাইব  
কে জানে কাহার কাছে!  
অগাধ বাসনা    অসীম আশা  
জগৎ দেখিতে চাই!  
জাগিয়াছে সাধ    চরাচরময়  
প্লাবিয়া বহিয়া যাই।  
যত প্রাণ আছে ঢালিতে পারি,  
যত কাল আছে বহিতে পারি,  
যত দেশ আছে ডুবাতে পারি,  
তবে আর কিবা চাই!  
পরানের সাধ তাই।

কী জানি কী হল আজি জাগিয়া উঠিল প্রাণ,  
দূর হতে শুনি যেন মহাসাগরের গান--  
'পাষণ-বাঁধন টুটি, ভিজায়ে কঠিন ধরা,  
বনেরে শ্যামল করি, ফুলেরে ফুটায়ে তুরা,  
সারাপ্রাণ ঢালি দিয়া,  
জুড়িয়ে জগৎ-হিয়া--  
আমার প্রাণের মাঝে কে আসিবি আয় তোরা!'

আমি যাব, আমি যাব, কোথায় সে, কোন্ দেশ--  
জগতে ঢালিব প্রাণ,  
গাহিব করুণাগান,  
উদ্বেগ-অধীর হিয়া  
সুদূর সমুদ্রে গিয়া  
সে প্রাণ মিশাব আর সে গান করিব শেষ।

ওরে, চারি দিকে মোর এ কী কারাগার ঘোর!  
ভাঙ্ ভাঙ্ ভাঙ্ কারা, আঘাতে আঘাত কর!  
ওরে, আজ কী গান গেয়েছে পাখি,  
এয়েছে রবির কর!

# প্রভাত- উৎসব

হৃদয় আজি মোর কেমনে গেল খুলি!  
জগত আসি সেথা করিছে কোলাকুলি!  
ধরায় আছে যত মানুষ শত শত  
আসিছে প্রাণে মোর, হাসিছে গলাগলি।  
এসেছে সখা সখী বসিয়া চোখাচোখি,  
দাঁড়ায়ে মুখোমুখি হাসিছে শিশুগুলি।  
এসেছে ভাই বোন পুলকে ভরা মন,  
ডাকিছে, ‘ভাই ভাই’ আঁখিতে আঁখি তুলি।  
সখারা এল ছুটে, নয়নে তারা ফুটে,  
পরানে কথা উঠে-- বচন গেল ভুলি।  
সখীরা হাতে হাতে ভ্রমিছে সাথে সাথে,  
দোলায় চড়ি তারা করিছে দোলাদুলি।  
শিশুরে লয়ে কোলে জননী এল চলে,  
বুকেতে চেপে ধরে বলিছে ‘ঘুমো ঘুমো’ ।  
আনত দু’নয়ানে চাহিয়া মুখপানে  
বাছার চাঁদমুখে খেতেছে শত চুমো।  
পুলকে পুরে প্রাণ, শিহরে কলেবর,  
প্রেমের ডাক শুনি এসেছে চরাচর--  
এসেছে রবি শশী, এসেছে কোটি তারা,  
ঘুমের শিয়রেতে জাগিয়া থাকে যারা।  
পরান পুরে গেল হরষে হল ভোর  
জগতে যারা আছে সবাই প্রাণে মোর।

প্রভাত হল যেই কী জানি হল এ কী!  
আকাশপানে চাই কী জানি কারে দেখি!

প্রভাতবায়ু বহে কী জানি কী যে কহে,  
মরমমাঝে মোর কী জানি কী যে হয়!  
এসো হে এসো কাছে সখা হে এসো কাছে- -  
এসো হে ভাই এসো, বোসো হে প্রাণময়।  
পুরব-মেঘমুখে পড়েছে রবিরেখা,  
অরুণরথচূড়া আধেক যায় দেখা।  
তরুণ আলো দেখে পাখির কলরব- -  
মধুর আহা কিবা মধুর মধু সব!  
মধুর মধু আলো, মধুর মধু বায়,  
মধুর মধু গানে তটিনী বয়ে যায়!  
যে দিকে আঁখি চায় সে দিকে চেয়ে থাকে,  
যাহারি দেখা পায় তারেই কাছে ডাকে,  
নয়ন ডুবে যায় শিশির-আঁখি-ধারে,  
হৃদয় ডুবে যায় হরষ-পারাবারে।  
আয় রে আয় বায়ু, যা রে যা প্রাণ নিয়ে,  
জগত-মাঝারেতে দে রে তা প্রসারিয়ে।  
ভ্রমিবি বনে বনে, যাইবি দিশে দিশে,  
সাগরপারে গিয়ে পুরবে যাবি মিশে।  
লইবি পথ হতে পাখির কলতান,  
যুথীর মৃদুশ্বাস, মালতীমৃদুবাস- -  
অমনি তারি সাথে যা রে যা নিয়ে প্রাণ।  
পাখির গীতধার ফুলের বাসভার  
ছড়াবি পথে পথে হরষে হয়ে ভোর,  
অমনি তারি সাথে ছড়াবি প্রাণ মোর।  
ধরারে ঘিরি ঘিরি কেবলি যাবি বয়ে  
ধরার চারি দিকে প্রাণেরে ছড়াইয়ে।

পেয়েছি এত প্রাণ যতই করি দান  
কিছুতে যেন আর ফুরাতে নারি তারে।  
আয় রে মেঘ, আয় বারেক নেমে আয়,  
কোমল কোলে তুলে আমারে নিয়ে যা রে!  
কনক-পাল তুলে বাতাসে দুলে দুলে  
ভাসিতে গেছে সাধ আকাশ-পারাবারে।

আকাশ, এসো এসো, ডাকিছ বুঝি ভাই--  
গেছি তো তোরি বুক, আমি তো হেথা নাই।  
প্রভাত-আলো-সাথে ছড়ায় প্রাণ মোর,  
আমার প্রাণ দিয়ে ভরিব প্রাণ তোর।

ওঠো হে ওঠো রবি, আমারে তুলে লও,  
অরুণতরী তব পুরবে ছেড়ে দাও,  
আকাশ-পারাবার বুঝি হে পার হবে--  
আমারে লও তবে, আমারে লও তবে।

জগৎ আসে প্রাণে, জগতে যায় প্রাণ  
জগতে প্রাণে মিলি গাহিছে একি গান!  
কে তুমি মহাজ্ঞানী, কে তুমি মহারাজ,  
গরবে হেলা করি হেসো না তুমি আজ।  
বারেক চেয়ে দেখো আমার মুখপানে--  
উঠেছে মাথা মোর মেঘের মাঝখানে,  
আপনি আসি উষা শিয়রে বসি ধীরে  
অরুণকর দিয়ে মুকুট দেন শিরে,  
নিজের গলা হতে কিরণমালা খুলি  
দিতেছে রবি-দেব আমার গলে তুলি!

ধূলের ধূলি আমি রয়েছি ধূলি-'পরে,  
জেনেছি ভাই বলে জগৎ চরাচরে।

# অনন্ত জীবন

অধিক করি না আশা, কিসের বিষাদ,  
জনমেছি দু দিনের তরে--  
যাহা মনে আসে তাই আপনার মনে  
গান গাই আনন্দের ভরে।  
এ আমার গানগুলি দু দণ্ডের গান  
রবে না রবে না চিরদিন--  
পুরব-আকাশ হতে উঠিবে উচ্ছ্বাস,  
পশ্চিমেতে হইবে বিলীন।

তোরা ফুল, তোরা পাখি, তোরা খোলা প্রাণ,  
জগতের আনন্দ যে তোরা,  
জগতের বিষাদ-পাসরা।  
পৃথিবীতে উঠিয়াছে আনন্দলহরী  
তোরা তার একেকটি ঢেউ,  
কখন উঠিলি আর কখন মিলালি  
জানিতেও পারিল না কেউ।

নাই তোর নাই রে ভাবনা,  
এ জগতে কিছুই মরে না।  
নদীস্রোতে কোটি কোটি মৃত্তিকার কণা  
ভেসে আসে, সাগরে মিশায়--  
জান না কোথায় তারা যায়!  
একেকটি কণা লয়ে গোপনে সাগর  
রচিছে বিশাল মহাদেশ,  
না জানি কবে তা হবে শেষ!

মুহূর্তেই ভেসে যায় আমাদের গান,  
জান না তো কোথায় তা যায়!  
আকাশের সাগরসীমায়!  
আকাশ-সমুদ্র-তলে গোপনে গোপনে  
গীতরাজ্য হতেছে সৃজন,  
যত গান উঠিতেছে ধরার আকাশে  
সেইখানে করিছে গমন।  
আকাশ পুরিয়া যাবে শেষ,  
উঠিবে গানের মহাদেশ।

নাই তোর নাই রে ভাবনা,  
এ জগতে কিছুই মরে না।  
কাল দেখেছিলাম পথে হরষে খেলিতেছিল  
দুটি ভাই গলাগলি করি  
দেখেছিলাম জানালায় নীরবে দাঁড়ায়েছিল  
দুটি সখা হাতে হাতে ধরি,  
দেখেছিলাম কচি মেয়ে মায়ের বাহুতে শুয়ে  
ঘুমায়ে করিছে স্তনপান,  
ঘুমন্ত মুখের ‘পরে বরষিছে স্নেহধারা  
স্নেহমাখা নত দু’নয়ান,  
দেখেছিলাম রাজপথে চলেছে বালক এক  
বৃদ্ধ জনকের হাত ধরি- -  
কত কী যে দেখেছিলাম, হয়তো সে-সব ছবি  
আজ আমি গিয়েছি পাসরি।  
তা বলে নাহি কি তাহা মনে?  
ছবিগুলি মেশেনি জীবনে?  
স্মৃতির কণিকা তারা স্মরণের তলে পশি  
রচিতেছে জীবন আমার- -

কোথা যে কে মিশাইল, কেবা গেল কার পাশে  
চিনিতে পারি নে তাহা আর।  
হয়তো অনেকদিন দেখেছিছু ছবি এক  
দুটি প্রাণী বাহুর বাঁধনে- -  
তাই আজ ছুটাছুটি এসেছি প্রভাতে উঠি  
সখারে বাঁধিতে আলিঙ্গনে।  
হয়তো অনেক দিন শুনেছিছু পাখি এক  
আনন্দে গাহিছে প্রাণ খুলি,  
সহসা রে তাই আজ প্রভাতের মুখ দেখি  
প্রাণ মন উঠিছে উথুলি।  
সকলি মিশেছে আসি হেথা,  
জীবনে কিছু না যায় ফেলা- -  
এই-যে যা-কিছু চেয়ে দেখি  
এ নহে কেবলি ছেলেখেলা।

এই জগতের মাঝে একটি সাগর আছে  
নিস্তন্ধ তাহার জলরাশি,  
চারি দিক হতে সেথা অবিরাম অবিশ্রাম  
জীবনের স্রোত মিশে আসি।  
সূর্য হতে ঝরে ধারা, চন্দ্র হতে ঝরে ধারা,  
কোটি কোটি তারা হতে ঝরে,  
জগতের যত হাসি যত গান যত প্রাণ  
ভেসে আসে সেই স্রোতোভরে- -  
মেশে আসি সেই সিন্ধু-’পরে।  
পৃথ্বী হতে মহাস্রোত ছুটিতেছে অবিরাম  
সেই মহাসাগর- উদ্দেশে,  
আমরা মাটির কণা জলস্রোত ঘোলা করি  
অবিশ্রাম চলিয়াছি ভেসে- -

সাগরে পড়িব অবশেষে।  
জগতের মাঝখানে সেই সাগরের তলে  
রচিত হতেছে পলে পলে  
অনন্ত-জীবন মহাদেশ,  
কে জানে হবে কি তাহা শেষ!

তাই বলি, প্রাণ ওরে, গান গা পাখির মতো,  
ক্ষুদ্র ক্ষুদ্র দুঃখ শোক ভুলি- -  
তুই যাবি, গান যাবে, একসাথে ভেসে যাবে  
তুই আর তোর গানগুলি।  
মিশিবি সে সিন্ধুজলে অনন্তসাগরতলে,  
একসাথে শুয়ে রবি প্রাণ,  
তুই আর তোর এই গান।

## অনন্ত মরণ

কোটি কোট ছোটো ছোটো মরণেরে লয়ে  
বসুন্ধরা ছুটিছে আকাশে,  
হাসে খেলে মৃত্যু চারি পাশে।  
এ ধরণী মরণের পথ,  
এ জগৎ মৃত্যুর জগৎ।

যতটুকু বর্তমান, তারেই কি বল' প্রাণ?  
সে তো শুধু পলক, নিমেষ।  
অতীতের মৃত ভার পৃষ্ঠেতে রয়েছে তার,  
না জানি কোথায় তার শেষ।  
যত বর্ষ বেঁচে আছি তত বর্ষ মরে গেছি,  
মরিতেছি প্রতি পলে পলে,  
জীবন্ত মরণ মোরা মরণের ঘরে থাকি  
জানি নে মরণ কারে বলে।

একমুঠা মরণেরে জীবন বলে কি তবে,  
মরণের সমষ্টি কেবল?  
একটি নিমেষ তুচ্ছ শত মরণের গুচ্ছ,  
নাম নিয়ে এত কোলাহল।  
মরণ বাড়িবে যত জীবন বাড়িবে তত,  
পলে পলে উঠিব আকাশে  
নক্ষত্রের কিরণনিবাসে।

মরণ বাড়িবে যত কোথায় কোথায় যাব,  
বাড়িবে প্রাণের অধিকার- -

বিশাল প্রাণের মাঝে কত গ্রহ কত তারা  
হেথা হোথা করিবে বিহার।  
উঠিবে জীবন মোর কত-না আকাশ ছেয়ে,  
ঢাকিয়া ফেলিবে রবি শশী- -  
যুগ-যুগান্তর যাবে, নব নব রাজ্য পাবে  
নব নব তারায় প্রবেশি।

কবে রে আসিবে সেই দিন  
উঠিব সে আকাশের পথে,  
আমার মরণ-ডোর দিয়ে  
বেঁধে দেব জগতে জগতে।  
আমাদের মরণের জালে  
জগৎ ফেলিব আবরিয়া,  
এ অনন্ত আকাশসাগরে  
দশ দিক রহিব ঘেরিয়া।

জয় হোক জয় হোক মরণের জয় হোক- -  
আমাদের অনন্ত মরণ,  
মরণের হবে না মরণ।  
এ ধরায় মোরা সবে শতাব্দীর ক্ষুদ্র শিশু  
লইলাম তোমার শরণ।  
এসো তুমি এসো কাছে, স্নেহ-কোলে লও তুমি,  
পিয়াও তোমার মাতৃস্তন,  
আমাদের করো হে পালন।  
আনন্দে পুরেছে প্রাণ, হেরিতেছি এ জগতে  
মরণের অনন্ত উৎসব।  
কার নিমন্ত্রণে মোরা মহাযজ্ঞে এসেছি রে,  
উঠেছে বিপুল কলরব।

যে ডাকিছে ভালোবেসে, তারে চিনিস নে শিশু?  
তার কাছে কেন তোর ডর?  
জীবন যাহারে বলে মরণ তাহারি নাম,  
মরণ তো নহে তোর পর।  
আয়, তারে অলিঙ্গন কর্-  
আয়, তার হাতখানি ধর।

# পুনর্মিলন

কিসের হরষ কোলাহল  
শুধাই তোদের, তোরা বল।  
আনন্দ-মাঝারে সব উঠিতেছে ভেসে ভেসে  
আনন্দে হতেছে কভু লীন- -  
চাহিয়া ধরনী-পানে নব আনন্দের গানে  
মনে পড়ে আর-এক দিন।  
সে তখন ছেলেবেলা--রজনী প্রভাত হলে,  
তাড়াতাড়ি শয্যা ছাড়ি ছুটিয়া যেতেম চলে;  
সারি সারি নারিকেল বাগানের এক পাশে,  
বাতাস আকুল করে আত্মমুকুলের বাসে।  
পথপাশে দুই ধারে  
বেলফুল ভারে ভারে  
ফুটে আছে, শিশুমুখে প্রথম হাসির প্রায়- -  
বাগানে পা দিতে দিতে  
গন্ধ আসে আচম্বিতে,  
নরগেস্ কোথা ফুটে খুঁজে তারে পাওয়া দায়।  
মাঝেতে বাঁধানো বেদী, জুঁইগাছ চারি ধারে- -  
সূর্যোদয় দেখা দিত প্রাচীরের পরপারে।  
নবীন রবির আলো  
সে যে কী লাগিত ভালো,  
সর্বাঙ্গে সুবর্ণসুধা অজস্র পড়িত ঝরে- -  
প্রভাত ফুলের মতো ফুটায়ে তুলিত মোরে।

এখনো সে মনে আছে  
সেই জানালার কাছে

বসে থাকিতাম একা জনহীন দ্বিপ্রহরে।  
অনন্ত আকাশ নীল,  
ডেকে চলে যেত চিল  
জানায়ে সুতীর তৃষা সুতীক্ষ্ণ করুণ স্বরে।  
পুকুর গলির ধারে,  
বাঁধা ঘাট এক পারে- -  
কত লোক যায় আসে, স্নান করে, তোলে জল- -  
রাজহাঁস তীরে তীরে  
সারাদিন ভেসে ফিরে,  
ডানা দুটি ধুয়ে ধুয়ে করিতেছে নিরমল।  
পূর্ব ধারে বৃদ্ধ বট  
মাথায় নিবিড় জট,  
ফেলিয়া প্রকাণ্ড ছায়া দাঁড়ায়ে রহস্যময়।  
আঁকড়ি শিকড়-মুঠে  
প্রাচীর ফেলেছে টুটে,  
খোপেখোপে ঝোপেঝোপে কত-না বিস্ময় ভয়।  
বসি শাখে পাখি ডাকে সারাদিন একতান-  
চারি দিক স্তব্ধ হেরি কী যেন করিত প্রাণ।  
মৃদু তপ্ত সমীরণ গায়ে লাগিত এসে,  
সেই সমীরণস্রোতে কত কি আসিত ভেসে  
কোন্ সমুদ্রের কাছে  
মায়াময় রাজ্য আছে,  
সেথা হতে উড়ে আসে পাখির ঝাঁকের মতো  
কত মায়া, কত পরী, রূপকথা কত শত।  
আরেকটি ছোটো ঘর মনে পড়ে নদীকূলে,  
সম্মুখে পেয়ারাগাছ ভরে আছে ফলে ফুলে।  
বসিয়া ছায়াতে তারি ভুলিয়া শৈশবখেলা,

জাহ্নবীপ্রবাহ-পানে চেয়ে আছি সারাবেলা।  
ছায়া কাঁপে, আলো কাঁপে, বুরু বুরু বহে বায়- -  
ঝর ঝর মর মর পাতা ঝরে পড়ে যায়।  
সাধ যেত যাই ভেসে  
কত রাজ্যে কত দেশে,  
দুলায়ে দুলায়ে ঢেউ নিয়ে যাবে কত দূর- -  
কত ছোটো ছোটো গ্রাম  
নূতন নূতন নাম,  
অভ্রভেদী শুভ্র সৌধ, কত নব রাজপুর।  
কত গাছ, কত ছায়া জটিল বটের মূল- -  
তীরে বালুকার 'পরে,  
ছেলেমেয়ে খেলা করে,  
সন্ধ্যায় ভাসায় দীপ, প্রভাতে ভাসায় ফুল।  
ভাসিতে ভাসিতে শুধু দেখিতে দেখিতে যাব  
কত দেশ, কত মুখ, কত-কী দেখিতে পাব।  
কোথা বালকের হাসি,  
কোথা রাখালের বাঁশি,  
সহসা সুদূর হতে অচেনা পাখির গান।  
কোথাও বা দাঁড় বেয়ে  
মাঝি গেল গান গেয়ে,  
কোথাও বা তীরে বসে পথিক ধরিল তান।  
শুনিতে শুনিতে যাই আকাশেতে তুলে আঁখি- -  
আকাশেতে ভাসে মেঘ, আকাশেতে ওড়ে পাখি।  
হয়তো বরষা কাল-- ঝর ঝর বারি ঝরে,  
পুলকরোমাঞ্চ ফুটে জাহ্নবীর কলেবরে- -  
থেকে থেকে ঝন্ ঝন্  
ঘন বাজ-বরিষন,  
থেকে থেকে বিজলীর চমকিত চকমকি।

বহিছে পুরব বায়,  
শীতে শিহরিছে কায়,  
গহন জলদে দিবা হয়েছে আঁধারমুখী।

সেই সেই ছেলেবেলা  
আনন্দে করেছি খেলা  
প্রকৃতি গো, জননী গো, কেবলি তোমারি কোলে।  
তার পরে কী যে হল-- কোথা যে গেলেম চলে।  
হৃদয় নামেতে এক বিশাল অরণ্য আছে,  
দিশে দিশে নাহিকো কিনারা,  
তারি মাঝে হ'নু, পথহারা।  
সে বন আঁধারে ঢাকা  
গাছের জটিল শাখা  
সহস্র স্নেহের বাহু দিয়ে  
আঁধার পালিছে বুকে নিয়ে।  
নাহি রবি, নাহি শশী, নাহি গ্রহ, নাহি তারা,  
কে জানে কোথায় দিগ্বিদিক।  
আমি শুধু একেলা পথিক।  
তোমারে গেলেম ফেলে,  
অরণ্যে গেলেম চলে,  
কাটালেম কত শত দিন  
ত্রিয়মাণ সুখশান্তিহীন।

আজিকে একটি পাখি পথ দেখাইয়া মোরে  
আনিল এ অরণ্য-বাহিরে  
আনন্দের সমুদ্রের তীরে।  
সহসা দেখিনু রবিকর,  
সহসা শুনি কত গান।

সহসা পাইনু পরিমল,  
সহসা খুলিয়া গেল প্রাণ।  
দেখিনু ফুটিছে ফুল, দেখিনু উড়িছে পাখি,  
আকাশ পুরেছে কলস্বরে।

জীবনের ঢেউগুলি ওঠে পড়ে চারিদিকে,  
রবিকর নাচে তার 'পরে।  
চারি দিকে বহে বায়ু, চারিদিকে ফুটে আলো,  
চারিদিকে অনন্ত আকাশ,  
চারি দিক-পানে চাই--চারি দিকে প্রাণ ধায়,  
জগতের অসীম বিকাশ।  
কেহ এসে বসে কোলে, কেহ ডাকে সখা ব'লে,  
কাছে এসে কেহ করে খেলা।  
কেহ হাসে, কেহ গায়, কেহ আসে, কেহ যায়--  
এ কী হেরি আনন্দের মেলা!  
যুবক যুবতি হাসে, বালক বালিকা নাচে  
দেখে যে রে জুড়ায় নয়ন।  
ও কে হোথা গান গায়, প্রাণ কেড়ে নিয়ে যায়,  
ও কী শুনি অমিয়-বচন।

তাই আজি শুধাই তোমারে,  
কেন এ আনন্দ চারিধারে!  
বুঝেছি গো বুঝেছি গো, এতদিন পরে বুঝি  
ফিরে পেলে হারানো সন্তান।  
তাই বুঝি দুই হাতে জড়িয়ে লয়েছ বৃকে,  
তাই বুঝি গাহিতেছ গান।  
ভালোবাসা খুঁজিবারে গেছিনু অরণ্যমাঝে,  
হৃদয়ে হইনু পথহারা,

বরষিনু অশ্রুবারিধারা।  
ভ্রমিলাম দূরে দূরে--কে জানিত বন্ দেখি  
হেথা এত ভালোবাসা আছে।  
যে দিকেই চেয়ে দেখি সেইদিকে ভালোবাসা  
ভাসিতেছে নয়নের কাছে।  
মা আমার, আজ আমি কত শত দিন পরে  
যখনি রে দাঁড়ানু সম্মুখে,  
অমনি চুমিলি মুখ, কিছু নাই অভিমান,  
অমনি লইলি তুলে বুকো।  
ছাড়িব না তোর কোল, রব হেথা অবিরাম,  
তোর কাছে শিখিব রে স্নেহ,  
সবারে বাসিব ভালো--কেহ না নিরাশ হবে  
মোরে ভালো বাসিবে যে কেহ।

# প্রতিধ্বনি

অয়ি প্রতিধ্বনি,  
বুঝি আমি তোরে ভালোবাসি,  
বুঝি আর কারেও বাসি না।  
আমারে করিলি তুই আকুল ব্যাকুল,  
তোর লাগি কাঁদে মোর বীণা।  
তোর মুখে পাখিদের শুনিয়া সংগীত,  
নির্ঝরের শুনিয়া ঝর্ঝর,  
গভীর রহস্যময় অরণ্যের গান,  
বালকের মধুমাখা স্বর,  
তোর মুখে জগতের সংগীত শুনিয়া,  
তোরে আমি ভালোবাসিয়াছি;  
তবু কেন তোরে আমি দেখিতে না পাই,  
বিশ্বময় তোরে খুঁজিয়াছি।

চিরকাল---চিরকাল- - - -  
তুই কি রে চিরকাল  
সেই দূরে রবি,  
আধো সুরে গাবি শুধু গীতের আভাস,  
তুই চিরকবি।  
দেখা তুই দিবি না কি? নাহয় না দিলি  
একটি কি পুরাবি না আশ?  
কাছে হতে একবার শনিবারে চাই  
তোর গীতোচ্ছ্বাস।  
অরণ্যের পর্বতের সমুদ্রের গান,  
ঝটিকার বজ্রগীতস্বর,

দিবসের প্রদোষের রজনীর গীত,  
চেতনার নিদ্রার মর্মর,  
বসন্তের বরষার শরতের গান,  
জীবনের মরণের স্বর,  
আলোকের পদধ্বনি মহা অন্ধকারে  
ব্যাপ্ত করি বিশ্বচরাচর,  
পৃথিবীর চন্দ্রমার গ্রহ-তপনের,  
কোটি কোটি তারার সংগীত,  
তোর কাছে জগতের কোন্ মাঝখানে  
না জানি রে হতেছে মিলিত।  
সেইখানে একবার বসাইবি মোরে  
সেই মহা-আঁধার নিশায়,  
শুনিব রে আঁখি মুদি বিশ্বের সংগীত  
তোর মুখে কেমন শুনায়।  
জোছনায় ফুলবনে একাকী বসিয়া থাকি,  
আঁখি দিয়া অশ্রুবারি ঝরে- -  
বল্ মোরে বল্ অয়ি মোহিনী ছলনা,  
সে কি তোরি তরে?  
বিরামের গান গেয়ে সায়াহ্নের বায়  
কোথা বহে যায়- -  
তারি সাথে কেন মোর প্রাণ হু হু করে,  
সে কি তোরি তরে?  
বাতাসে সৌরভ ভাসে, আঁধারে কত-না তারা,  
আকাশে অসীম নীরবতা- -  
তখন প্রাণের মাঝে কত কথা ভেসে যায়,  
সে কি তোরি কথা?  
ফুলের সৌরভগুলি আকাশে খেলাতে এসে

বাতাসেতে হয় পথহারা,  
চারিদিকে ঘুরে হয় সারা,  
মার কোলে ফিরে যেতে চায়,  
ফুলে ফুলে খুঁজিয়া বেড়ায়,  
তেমনি প্রাণের মাঝে অশরীরী আশাগুলি  
ভ্রমে কেন হেথায় হোথায়- -  
সে কি তোরে চায়?  
আঁখি যেন কার তরেপথ-পানে চেয়ে আছে  
দিন গনি গনি,  
মাঝে মাঝে কারো মুখে সহসা দেখে সে যেন  
অতুল রূপের প্রতিধ্বনি,  
কাছে গেলে মিলাইয়া যায়  
নিরাশের হাসিটির প্রায়- -  
সৌন্দর্যে মরীচিকা এ কাহার মায়া,  
এ কি তোরি ছায়া!

জগতের গানগুলি দূর-দূরান্তর হতে  
দলে দলে তোর কাছে যায়,  
যেন তারা বহি হেরি পতঙ্গের মতো  
পদতলে মরিবারে চায়!  
জগতের মৃত গানগুলি  
তোর কাছে পেয়ে নব প্রাণ,  
সংগীতের পরলোক হতে  
গান যেন দেহমুক্ত গান।  
তাই তার নব কণ্ঠধ্বনি  
প্রভাতের স্বপনের প্রায়,

কুসুমের সৌরভের সাথে  
এমন সহজে মিশে যায়।

আমি ভাবিতেছি বসে গানগুলি তোরে  
না জানি কেমনে খুঁজে পায়--  
না জানি কোথায় খুঁজে পায়।  
না জানি কী গুহার মাঝারে  
অস্ফুট মেঘের উপবনে,  
স্মৃতি ও আশায় বিজড়িত  
আলোক-ছায়ার সিংহাসনে,  
ছায়াময়ী মূর্তিখানি আপনে আপনি মিশি  
আপনি বিস্মিত আপনায়,  
কার পানে শূন্যপানে চায়!  
সায়াহে প্রশান্ত রবি স্বর্ণময় মেঘমাঝে  
পশ্চিমের সমুদ্রসীমায়  
প্রভাতের জন্মভূমি শৈশব পুরব-পানে  
যেমন আকুল নেত্রে চায়, পুরবের শূন্যপটে

প্রভাতের স্মৃতিগুলি  
এখনো দেখিতে যেন পায়,  
তেমনি সে ছায়াময়ী কোথা যেন চেয়ে আছে  
কোথা হতে আসিতেছে গান--  
এলানো কুন্তলজালে সন্ধ্যার তারকাগুলি  
গান শুনে মুদিছে নয়ান।  
বিচিত্র সৌন্দর্য জগতের  
হেথা আসি হইতেছে লয়।

সংগীত, সৌরভ, শোভা জগতে যা-কিছু আছে

সবি হেথা প্রতিধ্বনিময়।

প্রতিধ্বনি, তব নিকেতন,

তোমার সে সৌন্দর্য অতুল,

প্রাণে জাগে ছায়ার মতন- -

ভাষা হয় আকুল ব্যাকুল।

আমরণ চিরদিন কেবলি খুঁজিব তোরে

কখনো কি পাব না সন্ধান?

কেবলি কি রবি দূরে, অতি দূর হতে

শুনিব রে ওই আধো গান?

এই বিশ্বজগতের মাঝখানে দাঁড়াইয়া

বাজাইবি সৌন্দর্যের বাঁশি,

অনন্ত জীবনপথে খুঁজিয়া চলিব তোরে,

প্রাণমন হইবে উদাসী।

তপনেরে ঘিরি ঘিরি যেমন ঘুরিছে ধরা,

ঘুরিব কি তোর চারি দিকে?

অনন্ত প্রাণের পথে বরষিবি গীতধারা,

চেয়ে আমি রব অনিমিখে।

তোরি মোহময় গান শুনিতেছি অবিরত,

তোরি রূপ কল্পনায় লিখা- -

করিস নে প্রবঞ্চনা সত্য করে বল্ দেখি

তুই তো নহিস মরীচিকা?

কত বার আর্ত স্বরে শুধায়েছি প্রাণপণে,

অয়ি তুমি কোথায়- - কোথায়- -

অমনি সুদূর হতে কেন তুমি বলিয়াছ

‘কে জানে কোথায়’ ?  
আশাময়ী, ও কী কথা তুমি কি আপনহারা--  
আপনি জান না আপনায়?

# মহাস্বপ্ন

পূর্ণ করি মহাকাল পূর্ণ করি অনন্ত গগন,  
নিদ্রামগ্ন মহাদেব দেখিছেন মহান্ স্বপন্।  
বিশাল জগৎ এই প্রকাণ্ড স্বপন সেই,  
হৃদয়সমুদ্রে তাঁর উঠিতেছে বিশ্বের মতন।  
উঠিতেছে চন্দ্র সূর্য, উঠিতেছে আলোক আঁধার,  
উঠিতেছে লক্ষ লক্ষ নক্ষত্রের জ্যোতি-পরিবার।  
উঠিতেছে, ছুটিতেছে গ্রহ উপগ্রহ দলে দলে,  
উঠিতেছে ডুবিতেছে রাত্রি দিন, আকাশের তলে।  
একা বসি মহাসিন্ধু চিরদিন গাইতেছে গান,  
ছুটিয়া সহস্র নদী পদতলে মিলাইছে প্রাণ।  
তটিনীর কলরব, লক্ষ নির্ঝরের ঝর ঝর,  
সিন্ধুর গস্তীর গীত, মেঘের গস্তীর কণ্ঠস্বর,  
ঝটিকা করিছে হা হা আশ্রয়-আলয় তার ছাড়ি  
বাজায়ে অরণ্যবীণা ভীমবল শত বাহু নাড়ি,  
রুদ্র রাগ আলাপিয়া গড়ায়ে পড়িছে হিমরাশ  
পর্বতদৈত্যের যেন ঘনীভূত ঘোর অউহাস,  
ধীরে ধীরে মহারণ্য নাড়িতেছে জটাময় মাথা--  
ঝর ঝর মর মর উঠিতেছে সুগস্তীর গাথা।  
চেতনার কোলাহলে দিবস পুরিছে দশ দিশি,  
ঝিল্লিরবে একমন্ত্র জপিতেছে তাপসিনী নিশি,  
সমস্ত একত্রে মিলি ধ্বনিয়া ধ্বনিয়া চারি ভিত  
উঠাইছে মহা-হৃদে মহা এক স্বপনসংগীত।  
স্বপনের রাজ্য এই স্বপন-রাজ্যের জীবগণ  
দেহ ধরিতেছে কত মুহূর্মুহু নূতন নূতন।  
ফুল হয়ে যায় ফল, ফুল ফল বীজ হয় শেষে,

নব নব বৃক্ষ হয়ে বেঁচে থাকে কানন-প্রদেশে।  
বাষ্প হয়, মেঘ হয়, বিন্দু বিন্দু বৃষ্টিবারিধারা  
নির্ব্বার তটিনী হয়, ভাঙি ফেলে শিলাময় কারা।  
নিদাঘ মরিয়া যায়, বরষা শ্মশানে আসি তার  
নিবায় জলন্ত চিতা বরষিয়া অশ্রুবারিধার।  
বরষা হইয়া বৃদ্ধ শ্বেতকেশ শীত হয়ে যায়,  
যযাতির মতো পুন বসন্তযৌবন ফিরে পায়।  
এক শুধু পুরাতন, আর সব নূতন নূতন  
এক পুরাতন হৃদে উঠিতেছে নূতন স্বপন।  
অপূর্ণ স্বপন-সৃষ্ট মানুষেরা অভাবের দাস,  
জাগ্রত পূর্ণতা-তরে পাইতেছে কত না প্রয়াস।  
চেতনা ছিঁড়িতে চাহে আধো-অচেতন আবরণ- -  
দিনরাত্রি এই আশা, এই তার একমাত্র পণ।  
পূর্ণ আত্মা জাগিবেন, কভু কি আসিবে হেন দিন?  
অপূর্ণ জগৎ- স্বপ্ন ধীরে ধীরে হইবে বিলীন?  
চন্দ্র-সূর্য-তারকার অন্ধকার স্বপ্নময়ী ছায়া  
জ্যোতির্ময় সে হৃদয়ে ধীরে ধীরে মিলাইবে কায়া।  
পৃথিবী ভাঙিয়া যাবে, একে একে গ্রহতারাগণ  
ভেঙে ভেঙে মিলে যাবে একেকটি বিশ্বের মতন।  
চন্দ্র-সূর্য-গ্রহ চেয়ে জ্যোতির্ময় মহান্ বৃহৎ  
জীব-আত্মা মিলাইবে একেকটি জলবিশ্ববৎ।  
কভু কি আসিবে, দেব, সেই মহাস্বপ্ন-ভাঙা দিন  
সত্যের সমুদ্র-মাঝে আধো সত্য হয়ে যাবে লীন?  
আধেক প্রলয়জলে ডুবে আছে তোমার হৃদয়- -  
বলো, দেব, কবে হেন প্রলয়ের হইবে প্রলয়।

# সৃষ্টি স্থিতি প্রলয়

দেশশূন্য কালশূন্য জ্যোতিঃশূন্য, মহাশূন্য-’পরি  
চতুর্মুখ করিছেন ধ্যান,  
মহা অন্ধ অন্ধকার সভয়ে রয়েছে দাঁড়াইয়া- -  
কবে দেব খুলিবে নয়ান।  
অনন্ত হৃদয়-মাঝে আসন্ন জগৎ-চরাচর  
দাঁড়াইয়া স্তম্ভিত নিশ্চল,  
অনন্ত হৃদয়ে তাঁর ভূত ভবিষ্যৎ বর্তমান  
ধীরে ধীরে বিকাশিছে দল।  
লেগেছে ভাবের ঘোর, মহানন্দে পূর্ণ তাঁর প্রাণ  
নিজের হৃদয়পানে চাহি,  
নিস্তরঙ্গ রহিয়াছে অনন্ত আনন্দপারাবার- -  
কূল নাহি, দিগ্বিদিক নাহি।  
পুলকে পূর্ণিত তাঁর প্রাণ,  
সহসা আনন্দসিন্ধু হৃদয়ে উঠিল উথলিয়া,  
আদিদেব খুলিলা নয়ান;  
জনশূন্য জ্যোতিঃশূন্য অন্ধতম অন্ধকার-মাঝে  
উচ্ছ্বসি উঠিল বেদগান।  
চারি মুখে বাহিরিল বাণী  
চারি দিকে করিল প্রয়াণ।  
সীমাহারা মহা অন্ধকারে  
সীমামূন্য ব্যোমপারাবারে  
প্রাণপূর্ণ ঝটিকার মতো,  
ভাবপূর্ণ, ব্যাকুলতা-সম,  
আশাপূর্ণ অতৃপ্তির প্রায়,  
সঞ্চরিতে লাগিল সে ভাষা।

দূর দূর যত দূর যায়  
কিছুতেই অন্ত নাহি পায়- -  
যুগ যুগ যুগ যুগান্তর  
ভ্রমিতেছে আজিও সে বাণী,  
আজিও সে অন্ত নাহি পায়।

# স্রোত

জগৎ-স্রোতে ভেসে চলো, যে যেথা আছ ভাই!  
চলেছে যেথা রবি শশী চল্ রে সেথা যাই।  
কোথায় চলে কে জানে তা, কোথায় যাবে শেষে,  
জগৎ-স্রোত বহে গিয়ে কোন্ সাগরে মেশে।  
অনাদি কাল চলে স্রোত অসীম আকাশেতে,  
উঠেছে মহা কলরব অসীমে যেতে যেতে।  
উঠিছে ঢেউ, পড়ে ঢেউ, গনিবে কেবা কত!  
ভাসিছে শত গ্রহ তারা, ডুবিছে শত শত।  
ঢেউয়ের 'পরে খেলা করে আলোকে আঁধারেতে,  
জলের কোলে লুকাচুরি জীবনে মরণেতে।  
শতক কোটি গ্রহ তারা যে স্রোতে তৃণপ্রায়  
সে স্রোত-মাঝে অবহেলে ঢালিয়া দিব কায়,  
অসীম কাল ভেসে যাব অসীম আকাশেতে,  
জগৎ- কলকলরব শুনিব কান পেতে।  
দেখিব ঢেউ--উঠে ঢেউ, দেখিব মিশে যায়,  
জীবন-মাঝে উঠে ঢেউ মরণ-গান গায়।  
দেখিব চেয়ে চারি দিকে, দেখিব তুলে মুখ- -  
কত-না আশা, কত হাসি, কত-না সুখ দুখ,  
বিরাগ ঘেষ ভালোবাসা, কত-না হয়-হয়- -  
তপন ভাসে, তারা ভাসে, তা'রাও ভেসে যায়।  
কত-না যায়, কত চায়, কত-না কাঁদে হাসে- -  
আমি তো শুধু ভেসে যাব, দেখিব চারি পাশে।

অবোধ ওরে, কেন মিছে করিস 'আমি আমি' ।  
উজানে যেতে পারিবি কি সাগরপথগামী?

জগৎ-পানে যাবি নে রে, আপনা-পানে যাবি- -  
সে যে রে মহামরুভূমি, কী জানি কী যে পাবি।  
মাথায় করে আপনারে, সুখ-দুখের বোঝা,  
ভাসাতে চাস প্রতিকূলে-- সে তো রে নহে সোজা।  
অবশ দেহ, ক্ষীণ বল, সঘনে বহে শ্বাস,  
লইয়া তোর সুখদুখ এখনি পাবি নাশ।

জগৎ হয়ে রব আমি, একেলা রহিব না।  
মরিয়া যাব একা হলে একটি জলকণা।  
আমার নাহি সুখ দুখ, পরের পানে চাই- -  
যাহার পানে চেয়ে দেখি তাহাই হয়ে যাই।  
তপন ভাসে, তারা ভাসে, আমিও যাই ভেসে- -  
তাদের গানে আমার গান, যেতেছি এক দেশে।  
প্রভাত সাথে গাহি গান, সাঁঝের সাথে গাই,  
তারার সাথে উঠি আমি--তারার সাথে যাই।  
ফুলের সাথে ফুটি আমি, লতার সাথে নাচি,  
বায়ুর সাথে ঘুরি শুধু ফুলের কাছাকাছি।  
মায়ের প্রাণে স্নেহ হয়ে শিশুর পানে ধাই,  
দুখীর সাথে কাঁদি আমি সুখীর সাথে গাই।  
সবার সাথে আছি আমি, আমার সাথে নাই,  
জগৎ-স্রোতে দিবানিশি ভাসিয়া চলে যাই।

# চেয়ে থাকা

মনেতে সাধ যে দিকে চাই  
কেবলি চেয়ে রব।  
দেখিব শুধু, দেখিব শুধু,  
কথাটি নাহি কব।  
পরানে শুধু জাগিবে প্রেম,  
নয়নে লাগে ঘোর,  
জগতে যেন ডুবিয়া রব  
হইয়া রব ভোর।  
তটিনী যায়, বহিয়া যায়,  
কে জানে কোথা যায়;  
তীরেতে বসে রহিব চেয়ে,  
সারাটি দিন যায়।  
সুদূর জলে ডুবিছে রবি  
সোনার লেখা লিখি,  
সাঁঝের আলো জলেতে শুয়ে  
করিছে ঝিকিমিকি।  
সুধীর স্রোতে তরঙ্গিণী  
যেতেছে সারি সারি,  
বহিয়া যায়, ভাসিয়া যায়  
কত-না নরনারী।  
না জানি তারা কোথায় থাকে  
যেতেছে কোন্ দেশে,  
সুদূর তীরে কোথায় গিয়ে  
থামিবে অবশেষে।  
কত কী আশা গড়িছে বসে

তাদের মনখানি,  
কত কী সুখ কত কী দুখ  
কিছুই নাহি জানি।

দেখিব পাখি আকাশে ওড়ে,  
সুদূরে উড়ে যায়,  
মিশায়ে যায় কিরণমাঝে,  
আঁধাররেখাপ্রায়!  
তাহারি সাথে সারাটি দিন  
উড়িবে মোর প্রাণ,  
নীরবে বসে তাহারি সাথে  
গাহিব তারি গান।

তাহারি মতো মেঘের মাঝে  
বাঁধিতে চাহি বাসা,  
তাহারি মতো চাঁদের কোলে  
গড়িতে চাহি আশা!  
তাহারি মতো আকাশে উঠে,  
ধরার পানে চেয়ে  
ধরায় যারে এসেছি ফেলে  
ডাকিব গান গেয়ে।  
তাহারি মতো, তাহারি সাথে  
উষার দ্বারে গিয়ে,  
ঘুমের ঘোর ভাঙায়ে দিব  
উষারে জাগাইয়ে।

পথের ধারে বসিয়া রব  
বিজন তরুছায়,  
সমুখ দিয়ে পথিক যত

কত-না আসে যায়  
ধুলায় বসে আপন-মনে  
ছেলেরা খেলা করে,  
মুখেতে হাসি সখারা মিলে  
যেতেছে ফিরে ঘরে।

পথের ধারে ঘরের দ্বারে  
বালিকা এক মেয়ে,  
ছোটো ভায়েরে পাড়ায় ঘুম  
কত কী গান গেয়ে।  
তাহার পানে চাহিয়া থাকি  
দিবস যায় চলে,  
স্নেহেতে ভরা করুণ আঁখি—  
হৃদয় যায় গলে।  
এতটুকু সে পরানটিতে  
এতটা সুধারাশি।  
কাছেতে তাই দাঁড়িয়ে তারে  
দেখিতে ভালোবাসি।

কোথা বা শিশু কাঁদিছে পথে  
মায়েরে ডাকি ডাকি,  
আকুল হয়ে পথিকমুখে  
চাহিছে থাকি থাকি।  
কাতর স্বর শুনিতে পেয়ে  
জননী ছুটে আসে,  
মায়ের বুক জড়িয়ে শিশু

কাঁদিতে গিয়ে হাসে।  
অবাক হয়ে তাহাই দেখি  
নিমেষ ভুলে গিয়ে,  
দুইটি ফোঁটা বাহিরে জল  
দুইটি আঁখি দিয়ে।

যায় রে সাধ জগৎ-পানে  
কেবলি চেয়ে রই  
অবাক হয়ে, আপনা ভুলে,  
কথাটি নাহি কই।

# সাধ

অরণময়ী তরণী উষা  
জাগায়ে দিল গান।  
পুরব মেঘে কনকমুখী  
বারেক শুধু মারিল উঁকি,  
অমনি যেন জগৎ ছেয়ে  
বিকশি উঠে প্রাণ।  
কাহার হাসি বহিয়া এনে  
করিলি সুধা দান।  
ফুলেরা সব চাহিয়া আছে  
আকাশপানে মগন-মনা,  
মুখেতে মৃদু বিমল হাসি  
নয়নে দুটি শিশির-কণা।  
আকাশ-পারে কে যেন ব'সে,  
তাহারে যেন দেখিতে পায়,  
বাতাসে দুলে বাছটি তুলে  
মায়ের কোলে ঝাঁপিতে যায়।  
কী যেন দেখে, কী যেন শোনে- -  
কে যেন ডাকে, কে যেন গায়- -  
ফুলের সুখ, ফুলের হাসি  
দেখিবি তোরা আয় রে আয়।  
আ মরি মরি অমনি যদি  
ফুলের মতো চাহিতে পারি।  
বিমল প্রাণে বিমল সুখে  
বিমল প্রাতে বিমল মুখে  
ফুলের মতো অমনি যদি

বিমল হাসি হাসিতে পারি।  
দুলিছে, মরি, হরষ-স্রোতে,  
অসীম স্নেহে আকাশ হতে  
কে যেন তারে খেতেছে চুমো,  
কোলেতে তারি পড়িছে লুটে।  
কে যেন তারি নামটি ধ' রে  
ডাকিছে তারে সোহাগ ক' রে  
শুনিতে পেয়ে ঘুমের ঘোরে  
মুখটি ফুটে হাসিটি ফোটে,  
শিশুর প্রাণে সুখের মতো  
সুবাসটুকু জাগিয়া ওঠে।  
আকাশপানে চাহিয়া থাকে,  
না জানি তাহে কী সুখ পায়।  
বলিতে যেন শেখে নি কিছু,  
কী যেন তবু বলিতে চায়।  
আঁধার কোণে থাকিস তোরা,  
জানিস কি রে কত সে সুখ,  
আকাশপানে চাহিলে পরে  
আকাশপানে তুলিলে মুখ।  
সুদূর দূর, সুনীল নীল,  
সুদূরে পাখি উড়িয়া যায়।  
সুনীল দূরে ফুটিছে তারা,  
সুদূর হতে আসিছে বায়।  
প্রভাতকরে করি রে স্নান  
ঘুমাই ফুলবাসে,  
পাখির গান লাগে রে যেন

দেহের চারি পাশে।  
বাতাস যেন প্রাণের সখা,  
প্রবাসে ছিল, নতুন দেখা,  
ছুটিয়া আসে বুকের কাছে  
বারতা শুধাইতে।  
চাহিয়া আছে আমার মুখে,  
কিরণময় আমারি সুখে  
আকাশ যেন আমারি তরে  
রয়েছে বুক পেতে।  
মনেতে করি আমারি যেন  
আকাশ-ভরা প্রাণ,  
আমারি প্রাণ হাসিতে ছেয়ে  
জাগিছে উষা তরুণ মেয়ে,  
করণ আঁখি করিছে প্রাণে  
অরণসুধা দান।  
আমারি বুক প্রভাতবেলা  
ফুলেরা মিলি করিছে খেলা,  
হেলিছে কত, দুলিছে কত,  
পুলকে ভরা মন,  
আমারি তোরা বালিকা মেয়ে  
আমারি স্নেহধন।  
আমারি মুখে চাহিয়া তোর  
আঁখিটি ফুটিফুটি।  
আমারি বুক আলায় পেয়ে  
হাসিয়া কুটিকুটি।

কেন রে বাছা, কেন রে হেন  
আকুল কিলিবিলি,  
কী কথা যেন জানাতে চাস  
সবাই মিলি মিলি।  
হেথায় আমি রহিব বসে  
আজি সকালবেলা  
নীরব হয়ে দেখিব চেয়ে  
ভাইবোনের খেলা।  
বুকের কাছে পড়িবি ঢলে  
চাহিবি ফিরে ফিরে,  
পরশি দেহে কোমলদল  
স্নেহেতে চোখে আসিবে জল,  
শিশিরসম তোদের 'পরে  
ঝরিবে ধীরে ধীরে।

হৃদয় মোর আকাশ-মাঝে  
তারার মতো উঠিতে চায়,  
আপন সুখে ফুলের মতো  
আকাশপানে ফুটিতে চায়।  
নিবিড় রাতে আকাশে উঠে  
চারি দিকে সে চাহিতে চায়,  
তারার মাঝে হারিয়ে গিয়ে  
আপন মনে গাহিতে চায়।  
মেঘের মতো হারায় দিশা  
আকাশ-মাঝে ভাসিতে চায়--  
কোথায় যাবে কিনারা নাই,

দিবসনিশি চলেছে তাই  
বাতাস এসে লাগিছে গায়ে,  
জোছনা এসে পড়িছে পায়ে,  
উড়িয়া কাছে গাহিছে পাখি,  
মুদিয়া যেন এসেছে আঁখি,  
আকাশ-মাঝে মাথাটি থুয়ে  
আরামে যেন ভাসিয়া যায়,  
হৃদয় মোর মেঘের মতো  
আকাশ-মাঝে ভাসিতে চায়।  
ধরার পানে মেলিয়া আঁখি  
উষার মতো হাসিতে চায়।  
জগৎ-মাঝে ফেলিতে পা  
চরণ যেন উঠিছে না,  
শরমে যেন হাসিছে মৃদু হাস,  
হাসিটি যেন নামিল ভুঁয়ে,  
জাগায়ে দিল ফুলেরে ছুঁয়ে,  
মালতীবধু হাসিয়া তারে  
করিল পরিহাস।  
মেঘেতে হাসি জড়ায়ে যায়,  
বাতাসে হাসি গড়ায়ে যায়,  
উষার হাসি- - ফুলের হাসি- -  
কানন-মাঝে ছড়ায়ে যায়।  
হৃদয় মোর আকাশে উঠে  
উষার মতো হাসিতে চায়।

# সমাপন

আজ আমি কথা কহিব না।  
আর আমি গান গাহিব না।  
হেরো আজি ভোরবেলা এসেছে রে মেলা লোক,  
ঘিরে আছে চারি দিকে  
চেয়ে আছে অনিমিখে,  
হেরে মোর হাসিমুখ ভুলে গেছে দুখশোক।  
আজ আমি গান গাহিব না।

সকাতরে গান গেয়ে পথপানে চেয়ে চেয়ে  
এদের ডেকেছি দিবানিশি।  
ভেবেছিলাম মিছে আশা, বোঝে না আমার ভাষা,  
বিলাপ মিলায় দিশি দিশি।  
কাছে এরা আসিত না, কোলে বসে হাসিত না,  
ধরিতে চকিতে হত লীন।  
মরমে বাজিত ব্যথা--সাধিলে না কহে কথা--  
সাধিতে শিখি নি এতদিন।  
দিত দেখা মাঝে মাঝে, দূরে যেন বাঁশি বাজে,  
আভাস শুনিব যেন হয়।  
মেঘে কভু পড়ে রেখা, ফুলে কভু দেয় দেখা,  
প্রাণে কভু বহে চলে যায়।

আজ তারা এসেছে রে কাছে  
এর চেয়ে শোভা কিবা আছে।  
কেহ নাহি করে ডর, কেহ নাহি ভাবে পর,  
সবাই আমাকে ভালোবাসে

আগ্রহে ঘিরিছে চারি পাশে।  
এসেছিস তোরা যত জনা,  
তোদের কাহিনী আজি শোনা।  
যার যত কথা আছে খুলে বন্ মোর কাছে,  
আজ আমি কথা কহিব না।

আয় তুই কাছে আয়, তোরে মোর প্রাণ চায়,  
তোর কাছে শুধু বসে রই।  
দেখি শুধু, কথা নাহি কই।  
ললিত পরশে তোর পরানে লাগিছে ঘোর,  
চোখে তোর বাজে বেণুবীণা- -  
তুই মোরে গান শুনাবি না?  
জেগেছে নূতন প্রাণ, বেজেছে নূতন গান,  
ওই দেখ পোহায়েছে রাতি।

আমারে বুকতে নে রে, কাছে আয়--আমি যে রে  
নিখিলের খেলাবার সাথী।  
চারি দিকে সৌরভ, চারি দিকে গীতরব,  
চারি দিকে সুখ আর হাসি,  
চারি দিকে শিশুগুলি মুখে আধো আধো বুলি,  
চারি দিকে স্নেহপ্রেমরাশি!  
আমারে ঘিরেছে কারা, সুখেতে করেছে সারা,  
জগতে হয়েছে হারা প্রাণের বাসনা।  
আর আমি কথা কহিব না- -  
আর আমি গান গাহিব না।

# সংযোজন

## স্নেহ উপহার

শ্রীমতী ইন্দিরা প্রাণাধিকাসু।

বাবলা।

আয় রে বাছা কোলে বসে চা' মোর মুখ - পানে,  
হাসিখুশি প্রাণখানি তোর প্রভাত ডেকে আনে।  
আমার দেখে আসিস ছুটে, আমায় বাসিস ভালো,  
কোথা হতে পড়লি প্রাণে তুই রে উষার আলো।

দেখ রে প্রাণে স্নেহের মতো সাদা সাদা জুঁই ফুটেছে।  
দেখ রে, আমার গানের সাথে ফুলের গন্ধ জড়িয়ে গেছে।  
গোথেছি রে গানের মালা, ভোরের বেলা বনে এসে  
মনে বড়ো সাধ হয়েছে পরাব তোর এলোকেশে।  
গানের সাথে ফুলের সাথে মুখখানি মানাবে ভালো,  
আয় রে তবে আয় রে মেয়ে দেখ রে চেয়ে রাত পোহালো।  
কচিমুখটি ঘিরে দেব ললিতরাগিণী দিয়ে,  
বাপের কাছে মায়ের কাছে দেখিয়ে আসবি ছুটে গিয়ে।

চাঁদনি রাতে বেড়াই ছাতে মুখখানি তোর মনে পড়ে,  
তোর কথাটাই কিলিবিলি মনের মধ্যে নড়েচড়ে।  
হাসি হাসি মুখখানি তোর ভেসে ভেসে বেড়ায় কাছে,  
হাসি যেন এগিয়ে এল, মুখটি যেন পিছিয়ে আছে।  
কচি প্রাণের আনন্দ তোর ভাঙা বুকু দে ছড়িয়ে,  
ছোটো দুটি হাত দিয়ে তোর গলাটি মোর ধর জড়িয়ে।

বিজন প্রাণের দ্বারে বসে করবি রে তুই ছেলেখেলা,

চুপ করে তাই বসে বসে দেখব আমি সন্ধেবেলা।  
কোথায় আছিস, সাড়া দে রে, বুকের কাছে আয় রে তবে,  
তোর মুখেতে গানগুলি মোর কেমন শোনায় শুনতে হবে।

আমি যেন দাঁড়িয়ে আছি একটা বাবলা গাছের মতো  
বড়ো বড়ো কাঁটার ভয়ে তফাত থাকে লতা যত।  
সকাল হলে মনের সুখে ডালে ডালে ডাকে পাখি,  
আমার কাঁটা - ডালে কেউ ডাকে না চুপ করে তাই

দাঁড়িয়ে থাকি!

নেই বা লতা এল কাছে, নেই বা পাখি বসল শাখে,  
যদি আমার বুকের কাছে বাবলা ফুলটি ফুটে থাকে।  
বাতাসেতে দুলে দুলে ছড়িয়ে দেয় রে মিষ্টি হাসি,  
কাঁটা - জন্ম ভুলে গিয়ে তাই দেখে হরষে ভাসি!  
দূর কর ছাই, ঝোঁকের মাথায় বলে ফেললাম কত কী যে?  
কথাগুলো ঠেকছে যেন চোখের জলে ভিজে ভিজে!  
রবি কাকা।

# শরতে প্রকৃতি

কই গো প্রকৃতি রানী, দেখি দেখি মুখখানি,  
কেন গো বিষাদছায়া রয়েছে অধর ছুঁয়ে  
মুখানি মলিন কেন গো?  
এই যে মুহূর্ত আগে হাসিতে ছিলে গো দেখি  
পলক না পালটিতে সহসা নেহারি এ কি—  
মরনে বিলীন যেন গো!  
কেন তনুখানি ঢাকা শুভ্র কুহেলিকা বাসে  
মৃদু বিষাদের ভারে সুধীরে মুদিয়া আসে  
নয়ন - নলিন হেন গো?

ওই দেখো চেয়ে দেখো—একবার চেয়ে দেখো—  
চাঁদের অধর দুটি হাসিতে ভাসিয়া যায়।  
নিশীথের প্রাণে গিয়া সে হাসি মিশিয়া যায়।  
সে হাসির কোলে বসি কানন - গোলাপগুলি  
আধো আধো কথা কহে সোহাগেতে দুলি দুলি।  
সে হাসির পায়ে পড়ি নদীর লহরীগন  
যার যত কথা আছে বলিতে আকুল মন।  
সে - হাসির শিশুদুটি লতিকামন্ডপে গিয়া  
আঁধারে ভাবিয়া সারা বাহিরিবে কোথা দিয়া  
সে - হাসি অলসে চলি দিগন্তে পড়িয়া নুয়ে,  
মেঘের অধরপ্রান্ত একটু রয়েছে ছুঁয়ে।  
বলো তুমি কেন তবে  
এমন মলিন রবে?  
বিষাদ - স্বপন দেখে হাসির কোলেতে শুয়ে।

ঘোমটাটি খোলো খোলো  
মুখখানি তোলো তোলো  
চাঁদের মুখের পানে চাও একবার।  
বলো দেখি কারে হেরি এত হাসি তার!  
নিলাজ বসন্ত যবে কুসুমে কুসুমময়  
মাতিয়া নিজের রূপে হাসিয়া আকুল হয়,  
মলয় মরমে মরি,  
ফিরে হাহাকার করি—  
বনের হৃদয় হতে সৌরভ - উচ্ছাস বয়!  
তারে হেরি হয় না সে এমন হরষে ভোর ;  
কী চোখে দেখেছে চাঁদ ওই মুখখানি তোর!  
তুই তবু কেন কেন  
দারুণ বিরাগে যেন  
চাস নে চা চাঁদের হাসি চাঁদের আদর!  
নাই তোর ফুলবাস  
নাইক প্রেমের হাস,  
পাপিয়া আড়ালে বসি শুনায় না প্রেমগান!  
কী দুখেতে উদাসীনি  
যৌবনেতে সন্ন্যাসিনী!  
কাহার ধৈয়ানে মগ্ন শুভ্র বস্ত্র পরিধান?

এক - কালে ছিল তোর কুসুমিত মধুমাস—  
হৃদয়ে ফুটিত তোর অজস্র ফুলের রাশ ;  
যৌবন - উচ্ছাসে ভোর  
প্রাণের সুরভি তোর  
পথিক সমীরে সব দিলি তুই বিলাইয়া!  
শেষে গ্রীষ্মতাপে জ্বলি  
শুকাইল ফুল - কলি,

সর্বস্ব যাহারে দিলি সেও গেল পলাইয়া!  
চেতনা পাইয়া শেষে হইয়া সর্বস্ব - হারা  
সারাটি বরষা তুই কাঁদিয়া হইলি সারা!  
এত দিন পরে বুঝি শুকাইল অশ্রুধারা!  
আজ বুঝি মনে মনে করিলি দারুণ পণ  
যোগিনী হইবি তুই পাষাণে বাঁধিয়া মন!  
বসন্তের ছেলেখেলা ভালো নাহি লাগে আর—  
চপল চঞ্চল হাসি ফুলময় অলংকার!  
এখন যে হাসি হাসো আজি বিরাগের দিন,  
শুভ্র শান্ত সুবিমল বাসনা - লালসাহীন।  
এত করিলি পণ  
তবুও তো ক্ষণে ক্ষণ  
সে দিনের স্মৃতিছায়া হৃদয়ে বেড়ায় ভাসি।  
প্রশান্ত মুখের 'পরে  
কুহেলিকা ছায়া পড়ে—  
ভাবনায় মেঘ উঠে সহসা আলোক নাশি—  
মুহূর্তে কিসের লাগি  
আবার উঠিস জাগি  
আবার অধরে ফুটে সেই সে পুরানো হাসি!

ঘুমায়ে পড়িস যবে বিহ্বল রজনীশেষে,  
অতি মৃদু পা টিপিয়া উষা আসে হেসে হেসে,  
অতিশয় সাবধানে দুইটি আঙুল দিয়া  
কুয়াশা - ঘোমটা তোর দেয় ধীরে সরাইয়া।  
অমনি তরুণ রবি পাশে আসি মৃদুগতি  
মুদিত নয়ন তোর চুমে ধীরে ধীরে অতি!  
শিহরিয়া কাঁপি উঠি  
মেলিস নয়ন দুটি,

রাঙা হয়ে ওঠে তোর কপোল - কুসুমদল  
শরমে আকুল ঝরে শিশির - নয়নজল!

সুদূর আলায় হতে তাড়াতাড়ি খেলা ভুলি  
মাঝে মাঝে ছুটে আসে দুদন্ডের মেঘগুলি।  
চমকি দাঁড়িয়ে থাকে, ওই মুখপানে চায়,  
কাঁদিয়া কাঁদিয়া শেষে কাঁদিয়া মরিয়া যায়!  
কিসের বিরাগ এত, কী তপে আছিস ভোর!  
এত করে সেধে সেধে  
এত করে কেঁদে কেঁদে  
যোগিনী, কিছতে তবু ভাঙিবে না পণ তোর?  
যোগিনী, কিছতে কি রে ফিরিবে না মন তোর?